

Ballape: Team Grischun Central

Treis clubs – ena fegnameira

Gion Nutegn Stgier/FMR

Gio per la staschung da ballape 2021/22 èn treis clubs da ballape s'unias chegl tgi pertotga la partizium digls juniors. 255 juniors digls Clubs da ballape da Lai/Valbella, Surses e Tusang/Tgazzas survignan miglras kundiziuns per trenar ed on la pussebladad da giuier ainten egna dallas otg equipas digl Team Grischun Central.

Treis clubs da ballape or da treis vals, pero en problem. Agls Clubs da ballape da Lai/Valbella, Surses e Tusang/Tgazzas mantgan giuieders giovens. Per porscher ena bunga basa da trenadis è igl domber da juniors betg avantmang e chegl tar tot igls treis clubs. Uschia è chegl er tigl Club da ballape Surses igl cass. Per Ivan Brenn, igl president digl club, ena raschung da far la dumonda agls dus clubs da ballape vaschigns, da Lai/Valbella e da Tusang/Tgazzas, sch'ena collaboraziun sen scalem digls juniors fiss betg pussebla? Cun aveir chels dus clubs ple u manc igls madems problems scu igl CB Surses, chegl tgi pertotga la partizium dalla generaziun giovna, ò l'idea d'ena collaboraziun pi strètga catto en bung resung tigl president digls Clubs da ballape Lai/Valbella e Tu-



Igls treis presidents digls clubs da ballape digl Grischun central (da san.): Jan Kollegger, Tusang/Tgazzas, Gianni Paterlini, Lai/Valbella ed Ivan Brenn, Surses. Foto Gion Nutegn Stgier

sang/Tgazzas. I vegia duvro tschintg sedutas, dei Roman Stäbler digl Club da ballape Tusang/Tgazzas. Ossa seia la collaboraziun realitad e chegl seia en fatg fitg plaschevel betg angal pigls juniors, mabagn er pigls clubs.

Mintga junior duess pudeir giuier

Cun rinforzar la collaboraziun ègl pussebel d'angulivar igl domber digls juniors tar las annadas 2004 anfignen 2008. Uschia ègl er pussebel tgi igls juniors dallas annadas pi grondas u pi pitschnas on la pussebladad da giuier ainten en team ed ainten ena fermezza da classa tgi corresponda a lour abilitads ed a lour prestaziun. Cun pudeir giuier igls giovens duess er

neir mantignia igl plascheir da dar a ballape, cun esser chel savens betg ple avantmang. Cun en trenamaint pi professional ò mintga junior er pi tgunsch la pussebladad da giuier pi tard activ ainten en team dallas ligas regionalas. Graztga alla collaboraziun pi strètga è er avantmang ena occupaziun pigls giovens an lour taimp liber. Vetiers vign tgi igls juniors pon tgi-rar lour contacts existents cun lour ameis da ballape e neir tar novs contacts. Mintga junior resta er cun la collaboraziun commember digl club uriund. Profitar pon igls juniors er digl concept da furmaziun tg'è nia elaboro aposta an vista alla collaboraziun, ena collaboraziun tgi fò an mintga cass senn.

Otg squadras da juniors

Gio a parteir digls 20 da fanadour 2021 vignan igls juniors digls treis clubs da ballape a trenar an cuminanza per sa preparar sen la staschung da ballape 2021/22. Chella scumainza igl mez d'avost e vo anfignen alla fegn d'otgover. Las otg equipas da juniors gioian la mastranza sot igl nom Team Grischun Central, independent da tgenegn digls treis clubs tgi igls juniors dereivan. Per l'antschatta ò igl Team Grischun Central dus squadras da juniors B, dus da juniors C e schizont quatter da juniors D. Treno vign a Tinizong, Lai, Tusang e Tgazzas. Igl madem vala er schi las equipas digl Team Grischun Central gioian lour gis da tgesa. Er pigls transports agls trenadis ed agls gis dattigl ena schliaziun. Igls responsabels digls Clubs da ballape da Lai/Valbella, Surses e Tusang/Tgazzas èn persvadias d'aveir fatg cun chella midada da structura igl dretg zap per en bung avigneir. Donn seia tgi la collaboraziun cugl CB Panadoz seia betg reuscheida, punctuescha Roman Stäbler, chegl tg'ins vess benevento.



Juniors digls treis clubs da ballape s'unieschan tigl Team Grischun Central. Foto Gion Nutegn Stgier